

2 CORINTIOS

1 Pablojon, apóstolon i cha'an Cristo Jesús cha'an che' yom Dios. WΔ'an la quermano Timoteo quic'ot. Wolic ts'ijbubeñetla xñopt'añet bΔ la i cha'an Dios ya' ti Corinto yic'ot ti pejtelel Acaya. ²La' aq'uentiquetla i yutslel i pusic'al Dios yic'ot i ñΔch'tΔlel la' pusic'al ch'oyol bΔ ti Dios lac Tat yic'ot ti lac Yum Jesucristo.

I wocol Pablo

³La' subjic i ñuclel Dios i Tat lac Yum Jesucristo. JiñΔch lac Tat ja'el mu' bΔ i p'untañonla, mu' bΔ i ñuq'uesan lac pusic'al ti pejtelel wocol. ⁴Dios mi' ñuq'uesan lac pusic'al ti pejtelel lac wocol cha'an mi lac ñuq'uesΔbeñob i pusic'al yaño' bΔ ti pejtelel i wocol. Che' jini, mi lac ñuq'uesΔbeñob i pusic'al che' bajche' Dios tsi' ñuq'uesΔbeyonla lac pusic'al. ⁵Come che' bajche' lac ten cha'an jach i wocol Cristo, che' ja'el lac ten cha'an jach i ñuq'uesΔntel lac pusic'al yic'ot Cristo. ⁶Che' mi cubin lojon wocol, an i c'Δjñibal cha'an mic ñuq'uesΔbeñetla la' pusic'al cha'an mi la' coltΔntel. Che' mi' ñuq'uesΔbeñon lojon c pusic'al Dios, mi mejlel c ñuq'uesΔbeñetla la'

pusic'al. Che'Δch mi' yujtel che' mi la' cuch wocol lajal bajche' joñon lojon. ⁷Cujil lojon ti' xuc'tΔlel c pusic'al an chuqui mi caj la' taj. Come woli la' ñusan wocol che' bajche' joñon lojon. Jini cha'an woli la' taj i ñuq'uesΔntel la' pusic'al ja'el che' bajche' joñon lojon.

⁸Quermanojob, com mi la' ña'tan tsa cubi lojon cabΔl wocol ya' ti Asia. Mach cujchic c cha'an lojon yubil come wen wocol jax. Mach colicon lojon tsac ña'ta lojon. ⁹Pero tsa' ajq'uiyon lojon ti chΔmel yubil cha'an ma'anic mic xuc'chocon lojon c pusic'al tic bajñel p'ΔtΔlel, cojach ti Dios mu' bΔ i tech ch'ojyel jini chΔmeño' bΔ. ¹⁰Dios tsi' γΔc'Δyon lojon ti colel che' bΔ tsa cΔlΔ lojon chΔmel. Woli' chΔn ac'on lojon ti colel. Cujil lojon tic pusic'al Dios mi caj i chΔn ac'on lojon ti colel. ¹¹Jatetla ja'el mi la' coltañon lojon che' mi la' pejcΔbeñon lojon Dios. Che' jini cabΔlob mi caj i subeñob Dios wocolix i γΔlΔ cha'an c wenlel lojon mu' bΔ c taj lojon cha'an i yoración.

Ma'anic tsa' mejli ti majlel Pablo

¹²ÑΔch'Δl lojon c pusic'al come ti' p'ΔtΔlel Dios tsac mele lojon chuqui

isujm yic'ot chuqui toj. Jiñlach c ñuclel lojon. Tsa' ajnion lojon ti jump'ejl lojon c pusic'al aq'uebilon lojon ti Dios. Che'ach tsac p_{ASA} lojon c b_A w_A' ti pañimil. Ñumen tsac mele lojon chuqui uts'at ti la' tojlel, mach che'ic bajche' mi' ña'tañob ti pañimil, pero yic'ot i yutslal i pusic'al Dios. ¹³Jini woli b_A c ts'ijbubeñetla mi mejlel la' q'uel, mi mejlel la' ch'amben isujm. Com mi la' ch'amben isujm c'AlAl ti' cajibal. ¹⁴Come lamitaletla tsa'ix la' ch'ambe isujm, la' ñuclelon lojon che' bajche' jatetla ja'el c ñuclelet lojon ba' ora mi' cha' tilel lac Yum Jesús.

¹⁵Cujil xuc'ul la' pusic'al quic'ot. Jini cha'an tsac ña'ta tilel ñaxan ba' añetla cha'an ti' cha'yajlel tijicñayetla. ¹⁶Com ñumel ba' añetla che' mic majlel ti Macedonia. Che' loq'uemon ti Macedonia com cha' ñumel ba' añetla cha'an mi la' coltañon sujtel ti Judea. ¹⁷Che' b_A tsac ña'ta majlel ba' añetla, ¿to'ol t'an jach ba tsac cha'le? ¿Mu' ba c bajñel ña'tan chuqui com c mel? ¿Mu' ba c subeñetla ya' talon che' mach talonic?

¹⁸Che' bajche' xuc'ul i pusic'al Dios ma'anic mic subeñetla ti cha'chajp. Ma'anic mic subeñetla ya' talon che' mach talonic. ¹⁹Come mach cha'chajpic i t'an Jesucristo i Yalobil Dios tsa' b_A c subeyetla joñon quic'ot Silvano yic'ot Timoteo. Junsujm jach i t'an Jesucristo. ²⁰Pejtelel chuqui mi' subeñonla Dios mi caj i ts'actiyel ti Cristo. Jini cha'an ti Cristo mi lac sub "Amén" cha'an mi lac tsictesaben i ñuclel Dios. ²¹Diosach mu' b_A

i tem xuc'chocoñonla ti Cristo. Diosach tsa' b_A i yajcayonla cha'an i ye'tel. ²²Tsi' yotsabeyonla i sello. Tsi' yaq'ueyonla jini Espíritu ti lac pusic'al, i tejchibal jach i ye'tel.

²³La' i q'uel c pusic'al Dios come isujm maxto anic tsa' tiliyon ti Corinto ba' añetla come mach comic c tsats pejcañetla. ²⁴Mach la' yumonic lojon cha'an mic wersa subeñetla chuqui yom mi la' ñop. Wolij coltañetla cha'an mi la' taj i tijicñayel la' pusic'al, come xuc'uletla cha'an tsa' la' ñopo Cristo.

2 Tsa' ña'ta tic pusic'al ma'anix mic majlel ba' añetla che' ch'ijiyem c pusic'al. ²Mi tsac techbeyetla i ch'ijiyemlel la' pusic'al, ¿majqui mi caj i cha' ñuq'uesan c pusic'al? Cojach jatetla, pero mach mejliquetla mi ch'ijiyemetla cha'an c t'an. ³Tsac ts'ijbubeyetla cha'an yom mi la' mel la' b_A cha'an mi la' ñuq'uesabeñon c pusic'al che' mij c'otel ba' añetla, ame tejchic i ch'ijiyemlel c pusic'al ti' tojlel jini año' b_A i mul. Cujil i tijicñayel c pusic'al jiñlach i tijicñayel la' pusic'al ti la' pejtelel. ⁴Wocol tsa cubi che' b_A tsac ts'ijbubeyetla jun, come cabal tsac cha'le pensar ame c techbeñetla i ch'ijiyemlel la' pusic'al. Cabal tsa cubi wocol. Tsa' cha'le uq'uel. Pero wersa tsac ts'ijbu cha'an mi la' ña'tan mic wen c'uxbiñetla.

Ñusaben la' b_A la' mul

⁵Jini winic tsa' b_A i techbeyon i ch'ijiyemlel c pusic'al tsi' techbeyetla la' ch'ijiyemlel lamitaletla. ⁶Jasalix tsi' yubi wocol

jini am ba i mul. Come cabal tsi' tiq'uiyob hermanojob. ⁷Yomix mi la' ñusaben i mul. Yomix mi la' cha' ñuq'uesaben i pusic'al ame junyajlel ochic i ch'ijiyemlel. ⁸Jini cha'an mic subeñetla ti wocol t'an, pasbenla c'uxbiya. ⁹Jini cha'an tsac ts'ijbubeyetla cha'an com c ña'tan mi woli la' jac'beñon c t'an ti pejtelel. ¹⁰Majqui jach mi la' ñusaben i mul, joñon ja'el mic ñusaben i mul. Come jini mulil tsa' ba c ñusabe, mi an i mul, tsac ñusabe ti' tojlel Cristo cha'an mi la' taj la' wenlel, ¹¹ame p'at'ac Satanás ti la' contra. Come la cujil maña jax bajche' mi' mel i ye'tel xiba.

Ministrojob cha'an jini

Tsiji Xuc'ul* ba T'an

¹²Che' ba tsa' c'otiyon ti Troas cha'an mic sub i wen t'an Cristo, tsa' jambentiyon jump'ejl puerta yilal cha'an i ye'tel lac Yum. ¹³Pero ma'anic tsa' ñajch'i c pusic'al, come ma'anic tsac taja quermano Tito. Jini cha'an tsa' loq'uiyon. Tsa' majliyon ti Macedonia.

¹⁴Wocolix i yalal Dios come ti Cristo Jesús tsa'ix majli i cha'an ti lac tojlel. Jini cha'an mi' c'añonla ja'el ti' pucol jini xojocña ba che' mi la cac' ti cajñel Cristo ti pejtelel lum. ¹⁵Come xojocña mi' yubiñonla Dios cha'an woli' yajñel Cristo ti lac pusic'al. Xojocña i yutslel Cristo ti' tojlel jini woli ba i coltantelob yic'ot jini woliyo' ba ti sajtel. ¹⁶Che' mi' yubiñob jini sajtemo', mi' ña'tañob woli' majlelob ti toj mulil. Che' mi' yubiñob jini año' ba i cuxtalel, mi' ña'tañob añalch i cuxtalel. ¿Majqui an i p'at'alel cha'an mi' bajñel mel

jini e'tel? ¹⁷Come mach lajalonic lojon bajche' cabalob mu' ba i c'añob i t'an Dios cha'an yomob ganar che' bajche' xchoñoñelob. Come Dios tsi' chocoyon lojon tilel. Jini cha'an mic cha'len lojon subt'an ti isujm yic'ot i p'at'alel Cristo ti jump'ejl lojon c pusic'al ti' wut Dios.

3 ¿Woli ba c cha' sub lojon c ba ti uts'at? ¿Yom ba mic cha'len lojon che' bajche' mi' cha'leñob yaño' ba mu' ba i pasob majlel jun ba' mi' yac'ob i ba ti cajñel? ¿Yom ba mij c'ajtibeñetla jun mu' ba i yac'on lojon ti cajñel? ²I wentajetla jun mu' ba i yac'on ti cajñel. Ts'ijbubiletla tic pusic'al lojon. Calmbiletla i cha'an pejtelel winicob x'ixicob. Mi la' q'uejlel ti' tojlel pejtelelob che' bajche' jun. ³Come tsiquil i juñetla Cristo tsa' ba c ts'ijba lojon. Mach ti tintajic ts'ijbubiletla, pero yic'ot i yEspíritu jini cuxul ba Dios, mach ti xajlelic pero ti la' pusic'al.

⁴Xuc'ulon lojon ti Dios cha'an ti' p'at'alel Cristo, ⁵come ma'anic c bajñel p'at'alel lojon cha'an mic ña'tan lojon bajche' yom. Pero ch'oyolach ti Dios c p'at'alel lojon. ⁶Dios tsi' yalq'ueyon lojon c p'at'alel ti' ye'tel ti jini tsiji' ba t'an. Ma'anic mic sub lojon jini ts'ijbubil ba mandar mach ba mejlic i coltan winicob x'ixicob. Mic sub lojon laj cuxtalel mu' ba i yalq'ueñonla jini Ch'ujul ba Espíritu. Come jini ts'ijbubil ba mandar mi' tsansañonla yilal, pero jini Espíritu mi' yalq'ueñonla laj cuxtalel.

I ñuclel jini Tsijib Xuc'ul ba T'an

⁷Wen ñuc jini mandar mu' ba i yac'onla ti chamel, ts'ijbubil ba

ti xajlel. Che' bΛ tsa' aq'uentiyob israelob, ma'anic tsa' mejli i q'uelbeñob i wut Moisés cha'an tsa' wen tsictiyi i saclel Dios ti' wut, anquese ora jach tsa' caji ti yajpel. ⁸¿Mach ba ñumen ñuquic i ye'tel jini Espíritu? ⁹Mi ñuc jini mandar mu' bΛ i γac'onla ti toj mulil, ñumen ñuc jini t'an mu' bΛ i γac'onla ti q'uejlel ti toj. ¹⁰Jini cha'an jini ñuc bΛ ti yambΛ ora mach chΛn ñuquix wΛle che' bajche' jini c'ax ñuc bΛ. ¹¹Mi an i ñuclel jini tsa' bΛ jili, ñumen cabΛ i ñuclel jini mu' bΛ i coltañonla, come mach yujilic jilel.

¹²Che'Λch jini c pijtaya lojon, jini cha'an ch'ejl mic cha'len lojon t'an, come añΛch c pijtaya lojon. ¹³Mach che'ic bajche' Moisés, come tsi' moso i wut ti pisil ti' tojlel jini israelob ame q'uelbentic i wut che' bΛ wolix ti yajpel i saclel. ¹⁴Tsa' tsΛts'ayob i pusic'al jini israelob, come c'ΛΛΛ wale anto pisil yilal ti' wut che' mi' q'uelob jini oñiyi bΛ trato, come ma'anic mi' ch'Λmbeñob isujm. Mi' loc'sΛbentelob che' mi' ñopob Cristo. ¹⁵C'ΛΛΛ wale che' mi' q'uejlel i ts'ijbujel Moisés, mosbil i pusic'al ti pisil yilal. ¹⁶Pero che' mi' sutq'uiñob i bΛ cha'an mi' ñopob lac Yum, mi caj i loc'sΛbentelob jini pisil. ¹⁷Come lac Yum jiñΛch Espíritu. Jini am bΛ i cha'an i yEspíritu lac Yum librejix. Mach chΛn cΛchΛlix ti mandar. ¹⁸Che' jini hermanojob, mach chΛn mosolix lac wut yilal. Che' mi laj q'uelben i ñuclel lac Yum che' bajche' ti espejo, mi lac utsi tsictesan i ñuclel. Mi laj q'uextayel majlel ti' yejtal Cristo che' mi' mel i ye'tel i yEspíritu lac Yum ti lac pusic'al.

Tsiquil i ñuclel Dios ti p'ejt yilal

4 Jini cha'an ma'anic mic lujb'an lojon, come Dios tsi' p'untayon lojon che' bΛ tsi' γΛq'ueyon lojon que'tel. ²Ma'anic chuqui mic mel lojon ti mucul mi jinic quisintic bΛ. Ma'anic mic lotin lojon winicob. Ma'anic mic socben lojon i t'an Dios. Mic sub lojon i sujmllel jini wen t'an ti' tojlel Dios. Yujilob pejtelel winicob x'ixicob tojon lojon. ³Mi mucul jini wen t'an, mucul ti' tojlel jini woliyo' bΛ ti sajtel. ⁴Satanás, jiñΛch i dios jini jontolo' bΛ ti pañimil. Tsa'ix i γapbeyob i wut jini mach bΛ anic mi' ñopob Cristo, ame i q'uelob i saclel jini wen t'an ba' tsiquil i ñuclel Cristo i yejtal bΛ Dios. ⁵Ma'anic mic bajñel sub lojon c bΛ che' mic cha'len lojon subt'an. Mic sub lojon Jesucristo, come jiñΛch lac Yum. Joñon lojon la' winicon lojon cha'an tsi' coltayon lojon Jesús. ⁶Come Dios tsa' bΛ i γac'Λ mandar cha'an mi' tsictiyel i saclel pañimil ti ic'ch'ipan bΛ tsi' γac'Λ ti tsictiyel i saclel ti lac pusic'al cha'an mi lac ch'Λmben isujm woli' pas i ñuclel Cristo.

⁷Uts'atach i saclel Cristo am ba ti lac pusic'al. Che' yilal bajche' c'ax letsem tac bΛ i tojol lotol bΛ ti uc'um, come melbilonla ti lum che' bajche' uc'um. Tsiquil mach ch'oyolic ti joñonla jini ñuc bΛ lac p'ΛtΛlel, pero ch'oyol ti Dios. ⁸Joy ñet'bilon lojon ti wocol, pero an bajche' mi caj c loq'uel lojon. Mach cujilic lojon bajche' mi' caj ti ujtℓ, pero chΛn xuc'ul mic ñop lojon. ⁹Tic'Λbilon lojon pero

mach cɔybilonic lojon. Mic jajts'el lojon pero ma'anic mic jisantel lojon. ¹⁰Ti pejtelel ora tsiquil tic bac'tal lojon wolic chamel lojon che' bajche' tsa' chami Jesús cha'an mi' tsictiyel cuxul Jesús tic bac'tal lojon. ¹¹Come joñon lojon cuxulon ba lojon mi cajq'uel ti chamel ti pejtelel ora ti' ye'tel Jesús, cha'an mi' tsictiyel i cuxtalel Jesús tic bac'tal lojon yujil ba chamel. ¹²Che' mic sub lojon jini wen t'an, wolic chamel lojon, pero ti' caj jini t'an woli la' taj la' cuxtalel.

¹³Lajal mic ñop lojon tic pusic'al bajche' jini tsa' ba i ts'ijbu jini t'an: "Tsac ñopo. Jini cha'an tsac cha'le t'an", che'en. Joñon lojon ja'el mic ñop lojon. Jini cha'an mic cha'len lojon t'an. ¹⁴Come cujil lojon ti isujm, Dios tsi' teche ch'ojyel lac Yum Jesús. Mi caj i techon lojon ch'ojyel ja'el quic'ot Jesús. Dios mi caj i tempañon lojon yic'otetla ti' tojlel Jesús. ¹⁵Come mi cubin lojon pejtelel ili wocol cha'an mi la' taj la' wenlel. Che' mi' tajbeñob i yutslel i pusic'al Dios cabalob mi caj i subeñob Dios wocolix i yaɔa cha'an mi' yutsi tsictiyel i ñuclel Dios.

La' lac chan ñop Dios ti xuc'ul

¹⁶Jini cha'an ma'anic mic lujb'an lojon. Woli' p'at'an majlel lac pusic'al ti jujump'ejl q'uin, anquese woli ti chamel lac bac'tal. ¹⁷Come sejb lac wocol mu' ba la cubin. Poj jumuc' jach mi' ñumel. Wolix i p'ojlesabeñonla c'ax on ba lac ñuclel mach ba anic mi' jilel ti pejtelel ora. ¹⁸Come ma'anic mi lac xuc'chocon lac pusic'al ti chuqui tac mi laj q'uel ti pañimil, pero mi lac

xuc'chocon ti jini mach ba tsiquilic am ba ti panchan. Come jini tsiquil tac ba ñumel jach woli. Jini mach ba tsiquilic ma'anic mi' jilel ti pejtelel ora.

An lac chumlib mach ba melbilic ti c'ɔbal

5 Mi tsa' jisanti lac bac'tal ba' woli ti chumtal lac ch'ujlel, la cujil mi caj la caq'uentel lac bac'tal ti panchan aq'uebilon ba la ti Dios. Mach melbilic ti c'ɔbal jini otot am ba ti panchan. Mach yujilic jilel. ²Jini cha'an mi lac cha'len ajcan che' añon to la ti lac bac'tal. La comix lac bac'tal am ba ti panchan mu' ba caj lac lap che' bajche' bujcal. ³Come ma'anic mi caj la cajñel che' bajche' espíritu mach ba anic i bac'tal. ⁴Che' wa'to añonla ti lac bac'tal ila ti pañimil mi lac cha'len ajcan yic'ot tsic pusic'al. Mach la comic lac chilbentel, pero la comix chumtal ti tsiji' ba lac bac'tal cha'an mi' pantaɔyel jini yujil ba chamel ti jini mach ba yujilic chamel, cha'an cuxul mi la cajñel ti pejtelel ora. ⁵Jini cha'an Dios tsi' meleyonla cha'an che'ach yom mi la cajñel. Tsi' yaq'ueyonla jini Espíritu i tejchibal ba i ye'tel ti lac pusic'al.

⁶Jini cha'an mi lac chan xuc'chocon lac pusic'al, come la cujil maxto ya'ic añonla la quic'ot lac Yum che' wa'to añonla ti lac bac'tal. ⁷Come xuc'ul mi la cajñel cha'an jini mu' ba lac ñop, mach cha'anic chuqui mi laj q'uel. ⁸Añach lac pijtaya. La com laj cɔy lac bac'tal cha'an mi la cajñel yic'ot lac Yum. ⁹Jini cha'an mi lac cha'len wersa ja'el cha'an mi' q'uelonla ti

uts'at lac Yum mi wλ'to añonla ti lac bac'tal o mi mach wλ'ix añonla. ¹⁰Come ti pejtelonla wersa mi caj lac pas lac ba ti melobajal i cha'an Cristo cha'an mi la caq'uentel lac tojol ti jujuntiquilonla, cha'an lac melbal tsa' ba lac mele ti lac bac'tal, mi wen o mi jontol.

Jini t'an mu' ba i yuts'esañonla

¹¹Jini cha'an mi lac xic'ben winicob x'ixicob ti uts'at, come mi lac wen bac'nñan lac Yum. Cambil i cha'an Dios c pusic'al lojon. Mi cal cañal la' cha'an ja'el i winicon lojon ti isujm. ¹²Ma'anic wolic cha' subeñet cha'an mi la' q'uelon ti uts'at, pero cha'an mi la' taj la' ñucler tic tojlel lojon. Che' jini an chuqui mi mejlel la' suben jini winicob mu' ba i lon q'uelob i ba ti ñuc che' leco i pusic'al. ¹³Mi tonto mi' q'uelon lojon winicob, com jach c tsictesan lojon i ñucler Dios. Mi uts'at mi' q'uelob c ña'tabal lojon, woli jach c saclan lojon la' wenlel. ¹⁴Come i c'uxbiya Cristo mi' wersa xic'beñon lojon, come mic ña'tan lojon mi tsa' chami juntiquil winic cha'an pejtelel winicob x'ixicob, actan che' jini, ti Cristo tsa' laj chamiyonla cha'an mi' jilel i p'atalel mulil ti lac tojlel. ¹⁵Tsa' chami Cristo cha'an pejtelel winicob x'ixicob, cha'an mach yomic mi lac saclan lac bajñel wenlel joñonla tsa' ba aq'uentiyonla laj cuxtalel. Pero yom mi lac ñuq'uesan Cristo tsa' ba chami cha'añonla, tsa' ba cha' ch'ojyi.

¹⁶Jini cha'an ma'anix mi lac chlan q'uel lac ba che' bajche' ti yamba ora che' sajtemon tola. Mi tsa' laj

cañal Cristo che' bajche' winic che' ba tsa' ñumi ti pañimil, mach chlan che'ix mi laj can. ¹⁷Jini cha'an majqui jach an ti Cristo tsijib melbilix. Tsa'ix jili jini tsucul tac ba. Awilan tsijib melbil ti pejtelel. ¹⁸Ch'oyol ti Dios jini tsijib tac ba. Dios tsa'ix i yuts'esa lac pusic'al la quic'ot cha'an tsi' mañayonla Jesucristo. Tsa'ix i yaq'ueyon lojon que'tel ti jini t'an mu' ba i yuts'esabeñonla lac pusic'al yic'ot Dios. ¹⁹Mic sub lojon ili t'an. Dios tsi' pasa i ba ti Cristo che' ba tsi' yuts'esabeyob i pusic'al jini año' ba ti pañimil. Tsi' cuchbeyob i mul. Tsi' yaq'ueyon lojon tic wenta jini t'an mu' ba i yuts'esabeñonla lac pusic'al yic'ot Dios. ²⁰Jini cha'an chocbilon lojon majlel ti' q'uexol Cristo, come Dios woli' pejcañetla tic tojlel lojon. Mic subeñet lojon ti wocol t'an che' bajche' Cristo: La' uts'esantic la' pusic'al yic'ot Dios. ²¹Come Cristo ma'anic tsi' wis ñopo mulil, pero Dios tsi' yaq'ue i cuch pejtelel lac mul ti' bac'tal ya' ti cruz cha'an mi' yaq'ueñonla toj ba lac pusic'al ti Cristo.

Tsi' pasa i ba ti uts'at jini Pablo

6 Joñon lojon xtem e'telon lojon yic'ot Dios. Mic xic'beñetla ti uts'at ame lolomic jach mi la' ch'amben i yutslel i pusic'al Dios. ²Come Dios tsi' yala: "Tsa'ix c ñich'tabeyetla la' t'an ti jim ba ora che' woli ti sujbel la' coltantel. Tsa'ix j coltayetla ti' yorajlel coltaya". Che' tsi' yala Dios. Awilan, wale i yorajlelix mi la cochel. Wale i yorajlelix mi laj coltantel.

³Mic mel lojon chuqui toj ame anic majch mi cac' lojon ti yajlel,

ame wajlentic que'tel lojon. ⁴Ti pejtelel que'tel lojon tsiquíl x'e'telon lojon i cha'an Dios, che' mic cha'len lojon pijt ti' xuc'talel c pusic'al lojon, che' mic ñusan lojon wocol, che' anto chuqui yom c cha'an lojon, che' an lojon j c'oj'ol, ⁵che' mi cubin lojon asiyal, che' añon lojon ti ma'jquibal, che' mij contrajintel lojon, che' mic cha'len lojon wocol e'tel, che' ma'anic mic wáyel lojon, che' mi cubin lojon wi'ñal. ⁶Ti' sac'lel lojon c pusic'al yic'ot c ña'tabal lojon mij cuchben lojon i mul winicob x'ixicob yic'ot cutslel lojon, cha'an ti jini Ch'ujul ba Espíritu. Mij c'uxbin lojon winicob ti isujm, ⁷yic'ot jini isujm ba t'an, yic'ot i p'at'alel Dios, yic'ot toj ba c melbal lojon, i wentajach e'tijibal tac cha'an guerra cha'an mic mactan lojon j contra yic'ot cha'an mic puts'tesan. ⁸Mic pas lojon c ba ti uts'at che' mic ts'a'lentel lojon yic'ot che' mi ca'lentel lojon yic'ot che' mic sujbel lojon ti uts'at. Mic sujbel lojon ti xlot pero isujm chuqui mic sub lojon. ⁹Mi' lon alob mach cambilonic lojon che' wen cambilon lojon. Woliyon lojon ti chamel pero cuxulon lojon. Mi cajq'uel lojon ti wocol pero ma'anic mic tsansantel lojon. ¹⁰Ch'ijiyem lojon c pusic'al pero chan tijicñayon lojon. Ma'anic c chuba'an lojon, pero wen chumulob yaño' ba cha'an que'tel ti subt'an. Ma'anic mi ts'ita'ic c chuba'an lojon, pero c cha'añach lojon pejtelel chuqui tac an.

¹¹Hermanojob ti Corinto, wolic laj subeñetla chuqui wolic ña'tan tic pusic'al lojon. But'ul c pusic'al lojon

ti c'uxbiya. ¹²Cabal mij c'uxbiñet lojon, pero woli la' ñup'beñon la' pusic'al. ¹³Yom mi la' q'uextabeñon lojon j c'uxbiya che' bajche' yom. Wolic pejcañetla che' bajche' calobiletla. Jambeñon lojon la' pusic'al.

I templojonla jini cuxul ba Dios

¹⁴Mach mi la' cha'len ñujpuñel yic'ot jini mach ba anic mi' ñop Dios. Come ¿bajche' mi mejlel i tem ajñel chuqui toj yic'ot chuqui mach tojic? ¿Bajche' mi mejlel i tem ajñel i sac'lel pañimil yic'ot ac'alel? ¹⁵¿Bajche' mi' caj ti ajñel ti ñach'al Cristo yic'ot jini xiba? ¿Lajal ba chuqui mi' ña'tañob jini mu' ba i ñopob Cristo yic'ot jini mach ba anic mi' ñopob? ¹⁶I templo Dios ¿jim ba i pi'al jini dios tac? Joñonla i templojonla jini cuxul ba Dios che' bajche' tsi' yala Dios: “Mi caj c chumtal ti' tojlelob. Ya' mij caj ti ajñel. Mi caj cochel ti' Dios. Mi caj cotsañob tic cha'an”. Che' tsi' yala Dios. ¹⁷“Jini cha'an loq'uenla ti' tojlel mach ba anic mi' ñopob. Tats'la la' ba ba' añob”, che'en lac Yum. “Mach mi la' ñochtán chuqui tac bibi'. Mi caj c p'ayetla tilel ba' añon. ¹⁸Mi caj cochel ti la' Tat. Mi caj la' wochel ti calobil”, che'en lac Yum mach ba anic i p'isol i p'at'alel.

Tijicña Pablo cha'an tsi' c'ayayob i mul

7 C'uxbibilo' ba hermanojob, lac cha'añach jini albil ba i t'an Dios. Jini cha'an la' lac poc loq'uel pejtelel bibi' tac ba am ba ti lac bac'tal yic'ot lac pusic'al. La' lac bac'ñan Dios cha'an ch'ujul mi la' cajñel ti' tojlel.

²Jambeñon lojon la' pusic'al. Ma'anic majch tsac chilbe lojon i chubla'an, mi juntiquilic. Ma'anic majch tsac soco lojon. Ma'anic majch tsac loti lojon. ³Ma'anic mic subeñetla jini t'an cha'an mi ca'leñetla, come tsa'ix c subeyetla añetla tic pusic'al lojon cha'an mic tem ajñel quic'otetla yic'ot cha'an temel mi lac chamel. ⁴Cujil mi la' wajñel ti xuc'ul. An cabal c ñuclel cha'añetla. Tsa' la' wen ñuq'uesabeyon c pusic'al. Cabal jax i tijicñayel c pusic'al ti pejtelel c wocol lojon.

⁵Che' ba tsa' tiliyon lojon ti Macedonia, ma'anic tsac wis c'aja lojon co. Tsac taja lojon wocol yic'ot cabal leto baqui jach añon lojon. Tic pusic'al tsac cha'le lojon baq'uen. ⁶Pero Dios mu' ba i ñuq'uesabeñob i pusic'al jini ch'ijiyemo' ba tsi' ñuq'uesabeyon lojon c pusic'al che' ba tsa' tili Tito. ⁷Ñuc lojon c pusic'al cha'an tsa' tili Tito yic'ot cha'an tsa' la' ñuq'uesabe i pusic'al. Tsi' subeyon lojon uts'at woli la' c'uxbiñon lojon. Tsa' la' cha'le uq'uel. Tsa' bax'ayetla cha'an mij q'ueletla ti uts'at. Jini cha'an tsa' utsi p'ojli i tijicñayel c pusic'al.

⁸Ma'anix mic chan mel c pusic'al, anquese tsac mele c pusic'al cha'an tsa caq'ueyetla i ch'ijiyemlel la' pusic'al cha'an ti jini jun. Come isujm tsi' yaq'ueyetla i ch'ijiyemlel la' pusic'al pero cha'p'ejl uxp'ejl jach q'uin. ⁹Wale tijicñayon, mach cha'anic ch'ijiyem tsa' la' wubi, pero cha'an tsa' la' caya la' mul. Come Dios tsi' c'añla i ch'ijiyemlel la' pusic'al cha'an mi' toj'esañetla. Che' jini ma'anic tsa' la' taja

wocol cha'añon lojon. ¹⁰Come i ch'ijiyemlel lac pusic'al ch'oyol ba ti Dios mi' yaq'ueñonla laj cay lac mul cha'an mi laj coltanel. Tijicñayonla che' an i ch'ijiyemlel lac pusic'al ch'oyol ba ti Dios, pero i ch'ijiyemlel tilem ba ti pañimil mi' yaq' ti chamel. ¹¹La' wilan, uts'at tsa' ujtiyetla cha'an ti' ch'ijiyemlel la' pusic'al ch'oyol ba ti Dios. Tsa' la' toj'esa la' ba ti jump'ejl la' pusic'al. Tsa' caji la' ts'a'len mulil. Tsa' la' cha'le baq'uen. Cabal tsa' caji la' cha' c'uxbiñon. Tsa' bax'ayetla. Tsa' la' ju'sabeyob i pusic'al jini año' ba i mul. Ti pejtelel tsa' ba la' cha'le tsa' la' pasla la' ba ti toj. ¹²Jini cha'an tsac ts'ijbubeyetla, mach cha'anic jach jini am ba i mul yic'ot jini tsa' ba contrajinti, pero cha'an mi la' pasbeñon lojon c'ux mi la' wubiñon lojon ti lac Yum. ¹³Jini cha'an tsa' ñuc'a lojon c pusic'al, come tsa' ñuc'a la' pusic'al.

Ñumen cabal i tijicñayel lojon c pusic'al cha'an tsa' la' ñuq'uesabe i pusic'al Tito. ¹⁴Come tsac sube Tito bajche' mi caj la' jac' ti uts'at. Ma'anic mic cha'len quisin, come che'ach tsa' la' mele. Isujm pejtelel chuqui tsac subeyet lojon, che' ja'el isujmach chuqui tsac sube Tito cha'añetla. ¹⁵Wale cabal woli' c'uxbiñetla Tito, come woli' chan ña'tan bajche' tsa' la' jac'be i t'an ti la' pejtelel. Tsiltsilñayetla ti baq'uen tsa' la' paya ochel ba' añetla. ¹⁶Tijicñayon come kujilix uts'at woli la' wajñel.

On tsi' yac'ayob ofrenda

8

Com mi la' ña'tan ja'el hermanojob, Dios tsi'

yɑq'ueyob i yutslel i pusic'al jini x̄nopt'añob ya' ti Macedonia. ²Che' bɑ tsa' ilɔbentiyob i pusic'al ti cabal wocol, tsa' wen p'ojli i p'ewlel yic'ot i tijic̄ñayel i pusic'al anquese c'ax pobrejob. ³Testigojon cha'an ti' bajñel pusic'al tsi' ña'tayob i yɑc' ofrenda che' bajche' tsa' mejliyob. Ñumen on tsi' yɑc'ayob che' bajche' tsa' mejliyob. ⁴Cabal tsi' c'ajtibeyon lojon ti wocol t'an cha'an mic ch'ɔm majlel jini ofrenda ti Jerusalén cha'an mi' coltɔntelob i cha'año' bɑ Dios ya'i. ⁵Mach che'ic jach tsi' cha'leyob, pero ñaxan tsi' yɑc'ayob i bɑ ti' wenta lac Yum, wi'il tic tojlel lojon, cha'an mi' melob chuqui yom Dios. ⁶Jini cha'an tsac xic'be lojon Tito cha'an mi' majlel i tempa jini ofrenda tsa' bɑ i teche ti yambɔ ora, cha'an mi' yujtel jini wen bɑ e'tel ti' yutslel la' pusic'al. ⁷Come woli la' wen pas la' bɑ ti uts'at ti' xuc'talel la' pusic'al, yic'ot ti la' t'an, yic'ot ti la' ña'tɔbal. Wen bɔxetla. C'ux mi la' wubiñon lojon. Che'ɔch yom mi la' wen pas i yutslel la' pusic'al yic'ot la' wofrenda ja'el.

⁸Ma'anic mi caq'ueñetla mandar, pero mic subeñetla bajche' mi' melob yaño' bɑ, cha'an mi la' pas la' c'uxbiya ti isujm. ⁹Come cañɔlix la' cha'an i yutslel i pusic'al lac Yum Jesucristo. Jini wen chumul bɑ tsa' ochi ti pobre, come c'ux tsi' yubiyetla. Tsa' ochi ti pobre cha'an wen chumul mi la' wajñel.

¹⁰Jini cha'an mic subeñetla bajche' yom mi la' mel, come jatetla ti yambɔ jab tsa' la' ña'ta la' tempa jini taq'uin. Tsa' caji la' tempa ja'el. ¹¹Wɔle yom mi la' wujtesan la' tempa che' bajche' tsa'

la' ña'ta. Che' bajche' tsa' la' ña'ta ti jump'ejl la' pusic'al, yom ja'el ti jump'ejl la' pusic'al mi la' wujtesan che' bajche' c'amel an la' cha'an.

¹²Mi an majqui yom i yɑc' majtañal, la' i yɑc' loq'uem bɑ ti' chubɔ'an, mi on o mi mach onic. Mach mejlic i yɑc' chuqui mach i cha'anic.

¹³Anquese che'ɔch wolic subeñetla jini t'an, mach comic mi la' taj wocol cha'an mi' coltɔntelob yaño' bɑ. ¹⁴Pero com junlajal mi la' coltan la' bɑ. Che' an i ñumel la' chubɔ'an, yom mi la' wɔq'ueñob yaño' bɑ chuqui anto yom i cha'añob. Che'ɔch yom mi' yɑq'ueñetla i chubɔ'an che' anto yom la' cha'an. Mach yomic jelchojc jach mi la' wajñel. ¹⁵Che' bajche' ts'ijbubil: "Jini tsa' bɑ i tempa cabal i chubɔ'an, ma'anic i ñumel. Jini tsa' bɑ i tempa ts'ita', jasɔɔch i cha'an ja'el".

Tsa' chojqui majlel Tito ti Corinto

¹⁶Wocolix i yɔɔɔ Dios come tsi' yɑc'ayetla ti' pusic'al Tito che' bajche' tic pusic'al. ¹⁷Isujm Tito tsi' wen jac'beyon c t'an che' bɑ tsac sube majlel, come cabal mi' ña'tañetla ja'el. Jini cha'an tsi' c'añɔɔ i pusic'al ja'el cha'an mi' majlel ba' añetla. ¹⁸Tsa'ix c choco lojon majlel Tito cha'an i ye'tel ti jini wen t'an yic'ot yambɔ hermano mu' bɑ i q'uejlel ti ñuc i cha'an pejtelel x̄nopt'añob mu' bɑ i tempañob i bɑ. ¹⁹Tsa' yajcɔnti jini hermano ti' tojlel x̄nopt'añob cha'an mi' pi'leñon lojon majlel ti xɔmbal, cha'an mi' cha' ch'ɔm tilel jini taq'uin. Che' sujtemix yic'ot jini taq'uin mi caj c puc lojon cha'an mi'

wen tsictyel i ñuclel lac Yum yic'ot la' wutslel cha'an tsa' la' wac'la ti jump'ejl la' pusic'al. ²⁰Temel mic majlel lojon cha'an mi' wen tsictiyel uts'at bajche' mic puc lojon, ame anic majch mi' ya'leñon lojon cha'an cabal ili taq'uin woli ba la' wac'. ²¹Com c mel lojon chuqui toj, mach cojic jach ti' wut lac Yum, pero ti' wut winicob x'ixicob ja'el.

²²Wolic choc lojon majlel yamba hermano ja'el, come tsa'ix j q'uele lojon wen bax ti pejtelel i ye'tel. Ñumen bax wale come yujil mi caj la' wac' jini ofrenda che' bajche' tsa' la' ña'ta. ²³Tito jiñlach c pi'al mu' ba i coltañon ti jini e'tel ti la' tojlel. Pejtel ili la quermanojob tsa' ba chojquiyob majlel i cha'an xñopt'añob mu' ba i tempañob i ba, mi' tsictesañob i ñuclel Cristo. ²⁴Pasbeñob la' c'uxbiya. Melbenla che' bajche' tsac subeyob ti' tojlel pejtelel jini xñopt'añob, cha'an mi' ña'tañob mach lolomic mi' ñuc'an c pusic'al ti la' tojlel.

9 Mach wersajic mic ts'ijbubeñetla bajche' yom mi la' wac'ueñob ofrenda i cha'año' ba Dios. ²Come cujil la' wom la' coltañob ti jump'ejl la' pusic'al che' bajche' tsac subeyob jini año' ba ti Macedonia. Come tsac subeyob anix jump'ejl jab tsa' caji la' chajpan la' pusic'al añet ba la ti Acaya. Cabal ti Macedonia tsa' nijcantiyob i pusic'al che' ba tsi' yubiyob chuqui tsa' la' ña'ta. ³Wolic choc majlel ili hermanojob ame to'o lolomic jach c t'an tsa' ba c subeyob año' ba ti Macedonia. Yom chajpabiletla che' bajche' tsac subeyob. ⁴Mi tsa' c'otiyon yic'ot jini ch'oyolo'

ba ti Macedonia che' mach chajpabiletla, quisintic jax mi caj cubin lojon. Quisintic jax mi caj la' wubin ja'el, come tsac subeyob uts'at woli la' mel. ⁵Jini cha'an tsac ña'ta wersa yom mic xic'ben jini hermanojob cha'an mi' ñaxan majlelob ba' añetla. Mi caj i q'uelob bajche' woli la' tempañon jini ofrenda ña'tabil ba la' cha'an. Yom chajpabiletla jini ofrenda che' mi' c'otelob. Ac'ala ti' yutslel la' pusic'al, mach cha'anic xic'biletla.

On yom mi lac pac'

⁶Mic subeñetla jini t'an. Jini ts'ita' jach ba mi' pac', ts'ita' jach mi' c'aj. Jini on ba mi' pac', on mi' c'aj. ⁷Ti jujuntiquil la' i yac' che' bajche' tsi' ña'ta ti' pusic'al, mach ti' ch'ijiyemlelic, mach cha'anic xic'bebil jach. Dios mi' c'uxbin jini mu' ba i yac' ti' tijicñayel i pusic'al. ⁸An i p'atla'lel Dios cha'an mi' cha' aq'ueñetla pejtelel chuqui tac yom cha'an jasal la' cha'an ti pejtelel ora cha'an mi la' coltan la' ba ti pejtelel chuqui wen. ⁹Che' bajche' ts'ijbubil: “Dios mi' puc majtañal. Mi' yac'ueñob jini mach ba añobic i cha'an. Toj i pusic'al ti pejtelel ora”, che'en. ¹⁰Dios mi' yac'uen pac' jini xpac'oñel. Mi' yac'ueñetla la' waj cha'an mi la' c'ux. Mi caj i yutsi aq'ueñetla pac' yic'ot waj cha'an mi la' wac'ueñob yaño' ba ti' yutslel la' pusic'al. Mi caj i p'ojlesabeñetla la' chobejtabal. ¹¹Che' jini Dios mi caj i yac'ueñetla pejtelel chuqui tac yom cha'an mi la' p'ewbeñob la' chub'an jini mach ba añobic i cha'an, cha'an mi' subeñob wocolix i yala Dios che' mic pucbeñob i majtan.

¹²Come che' mi la' coltan i cha'año' bΛ Dios, mi' tajob chuqui anto yom i cha'añoob. Che' jini cabal mi caj i subeñoob wocolix i yΛΛ Dios. ¹³Che' bΛ tsa'ix la' colta i cha'año' bΛ Dios yic'ot yaño' bΛ, cabalob mi caj i subob i ñuelcel Dios cha'an tsa' la' jac'be i t'an Cristo woli bΛ la' ñop. Tsa' la' p'ewbeyob la' chubΛ'an. ¹⁴Mi caj i tajetla ti oración ja'el, come c'ux mi' yubiñetla cha'an ñuc bΛ i yutslel i pusic'al Dios woli bΛ la' tsictesan. ¹⁵Wocolix i yΛΛ Dios cha'an tsi' yΛq'ueñoñla lac majtan c'ax letsem bΛ i tojlo.

**Pablo tsi' subeyob bajche'
tsi' mele i ye'tel**

10 Joñon Pablojon, wolic pejcañetla che' bajche' Cristo ti uts bΛ t'an. An mu' bΛ i yalob lijicñayon jach che' ya' añoñ ti la' tojlel, pero ch'ejl abi mic pejcañetla ti jun che' mach ya'ic añoñ la' wic'ot. ²Mij c'ajtibañetla ti wocol t'an mach mi la' nijcañon ame ch'ejlic mic mel c bΛ che' ya' añoñ la' wic'ot. Wolic ña'tan ch'ejl mi caj c mel c bΛ ti' tojlel jini mu' bΛ i lon alob wolic mel lojon che' bajche' yom c bajñel pusic'al lojon. ³Añoñ lojon tic bΛc'tal pero mach tic bajñel p'ΛtΛlelic lojon woliyon lojon ti guerra. ⁴Come jini que'tijib mu' bΛ j c'Λn lojon ti guerra mach melbilic ti winicob. CabalΛch i p'ΛtΛlel tilem bΛ ti Dios cha'an mic jemben lojon i ye'tel xiba. ⁵Mic lamben lojon pejtet lolom jach bΛ i t'an winicob, yic'ot pejtet i ña'tabal mu' bΛ i mactan yaño' bΛ ti' cañoñ i sujmler Dios. Mic tic' lojon pejtelel chuqui mi' lon tejchel tic bajñel

pusic'al lojon cha'an mic jac'ben lojon i t'an Cristo. ⁶ChajpΛbilon lojon cha'an mic mel lojon pejtelel mu' bΛ i ñusΛbeñoob i t'an Cristo che' ts'ΛcΛl tsa'ix la' jac'be i t'an.

⁷Woli la' q'uelon che' bajche' i tilel winicob ti pañimil. Mi an majch mi' ña'tan ochem ti Cristo, la' i ña'tan ochemon lojon ti Cristo ja'el. ⁸Ma'anic mic cha'len lojon quisin mi tsac subu lojon c bΛ ti ñuc cha'an c p'ΛtΛlel lojon tsa' bΛ i yΛq'ueyon lojon lac Yum, come aq'uebilon lojon cha'an mic xuc'chocoñetla, mach cha'anic mic jisañetla. ⁹Com mi la' ña'tan ma'anic wolic lon bΛc'tesañetla tic jun tac. ¹⁰Come an mu' bΛ i yalob: Isujm, wen tsΛts, wen p'ΛtΛl i t'an jini jun tac. Pero mach p'ΛtΛlic Pablo ti lac tojlel. Mach ch'ejlic mu' ti t'an, che'ob. ¹¹La' i ña'tañoob ili winicob: che'Λch bajche' mic cha'len lojon t'an tic jun che' mach ya'ic añoñ lojon, che' ja'el mi caj c pas lojon c bΛ tic melbal che' ya' añoñ lojon.

¹²Mach comic c laj lojon c bΛ yic'ot jini mu' bΛ i bajñel subob i ñuelcel. Mach lajalonic lojon yic'otob. Mi' bajñel p'isob i bΛ ti ñuc yic'ot i pi'Λlob. Mi' bajñel lajob i bΛ yic'ot i pi'Λlob. Tonto jax bajche' mi' melob. ¹³Pero joñon lojon ma'anic mic bajñel sub lojon c bΛ ti ñuc. Wolic ñop lojon c mel chuqui yom Dios che' bajche' mi' pasbeñoñ lojon. Cujil tsi' paγayon lojon c melben i ye'tel c'ΛΛal ba' añetla. Tsi' yΛq'ueyon lojon c p'ΛtΛlel cha'an mij cantesañetla. ¹⁴Ma'anic wolic bajñel ñuq'uesan majlel lojon que'tel aq'uebilon bΛ lojon

ti la' tojlel. Come ñaxan tsa' c'oti c subeñet lojon i wen t'an Cristo. ¹⁵Ma'anic wolij q'uel lojon c ba ti ñuc cha'an i ye'tel yaño' ba. Com lojon xuc'ul mi la' ñop Dios. Che' jini mi caj i ñuc'an majlel que'tel ti la' tojlel che' bajche' tsi' p'isbeyon lojon Dios. ¹⁶Che'ach yom mic sub lojon jini wen t'an ja'el ti yamba lum tac ti la' junwejlel, mach ya'ic ba' woli ti e'tel yamba, ame mij q'uel c ba ti ñuc cha'an chuqui tac melbil i cha'an. ¹⁷Jini yom ba i sub chuqui ñuc, la' i sub i ñuclel lac Yum. ¹⁸Come mach jinic mi' q'uejlel ti uts'at mu' ba i bajñel sub i ba ti ñuc, cojach jini mu' ba i sujbel ti ñuc ti Dios.

Pablo yic'ot jini payxo apóstol

11 Yom mi la' ts'ita' cuchbeñon c t'an, anquese tonto yubil. ²Com mi la' taj la' wenlel che' bajche' yom Dios. Come tsa'ix c sijiyetla cha'an mi la' taj juntiquil jach la' ñoxi'al. Com caq'uetla ti' wenta Cristo che' bajche' tsi' ba xch'oc. ³Mic cha'len baq'uen ame cajic ti sojquel la' ña'tabal cha'an lot che' bajche' jini lucum tsi' loti Eva cha'an mach chan xuc'uleticla yic'ot Cristo. ⁴Che' mi' tilel winic cha'an mi' subeñetla yamba Jesús mach ba tsa'ic c subeyet lojon, o mi tsa' aq'uentiyetla yamba espíritu mach jinic tsa' ba aq'uentiyetla, o mi yamba wen t'an mach jinic tsa' ba la' ñopo, tsiquil woli la' jac'beñob ti ora. ⁵Mi cal mach ñumen ñucobic che' bajche'on jini yaño' ba mu' ba i lon cuyob i ba ti ñuc ba apóstolob. ⁶Anquese mach ch'ejonlic ti t'an, cabal'ach

c ña'tabal che' bajche' tsa' wen tsictiyi ti pejtelel c melbal ya' ti la' tojlel.

⁷¿Tsa' ba c cha'le mulil che' ba tsac mele c ba ti pec' cha'an mi la' taj la' ñuclel, che' ba tsac subeyetla i wen t'an Dios ti la' majtan jach? ⁸Tsac chilbeyob i yofrenda yamba xñopt'añob yubil che' ba tsi' coltayoñob cha'an mij coltañetla. ⁹Che' ya' añoñ quic'otetla che' anto chuqui yom c cha'an, ma'anic chuqui tsaj c'ajtibeyetla. Come jini hermanojob tilemo' ba ti Macedonia tsi' yaq'ueyoñob chuqui anto yom c cha'an. Che'ach tsac ñusa wocol ame mi la' wubin wocol cha'añoñ. Che'ach mi caj c chan cha'len. ¹⁰Mic subeñetla cha'an ti' sujmllel Cristo am ba tic pusic'al, ma'anic majch mi caj i tic'on ti' subol ti pejtelel Acaya. ¹¹¿Chucoch? ¿Cha'an ba ma'anic wolij c'uxbiñetla? Yujil Dios c'ux mi cubiñetla.

¹²Che' bajche' wolic mel mi caj c chan mel, cha'an mic tsictesabeñob i lotob mu' ba i bajñel subob i ba ti ñuc. Come jini winicob mi' lon alob lajal woliyob ti e'tel bajche'on lojon. ¹³Xlotob mu' ba i subob i ba ti apóstolob, x'e'telob mu' ba i cha'leñob lotiya. Mi' lon subob i ba ti apóstol i cha'an Cristo. ¹⁴I tilel che'ach mi' melob, come Satanás ja'el mi' cuy i ba ti ángel mu' ba i pas i c'ac'al. ¹⁵I tilel che'ach mi' melob i winicob ja'el. Mi' lon cuyob i ba ti toj ba x'e'telob, pero mi caj i jilelob cha'an leco i melbal.

I wocol Pablo ti' ye'tel lac Yum

¹⁶Mic cha' subeñetla: Mach mi la' q'uelon ti tonto. Pero mi

tontojon, payayon che' bajche' mi la' pay juntiquil tonto ba cha'an mic ts'ita' sub c ñucel ja'el. ¹⁷Mach tilemic ti lac Yum chuqui wolic sub, pero wolic sub che' bajche' juntiquil tonto ba mu' ba i sub i bajñel ñucel. ¹⁸An cabalob mu' ba i subob i ba ti ñuc cha'an chuqui tac mi' tajob ti pañimil. Joñon ja'el mi caj c sub c ñucel. ¹⁹Come tijicña mi la' wubibeñob i t'an jini tontojo' ba. Wen an la' ña'tabal mi la' wal. ²⁰Mi la' cuchben che' an majch mi' yotsañetla ti majtan e'tel yic'ot che' an majch mi' jisabeñetla la' chuba'an, che' an majch mi' lotiñetla, che' an majch mi' chañ'esan i ba, che' an majch mi' poch'iñetla. ²¹Mic cha'len lojon quisin che' mic subeñetla, imach ch'ejlonic lojon che' bajche' jini yaño' ba!

Mi an i p'atlel yamba winic cha'an mi' sub i ba ti ñuc, an c p'atlel ja'el cha'an mic sub c ba ti ñuc. Mic sub jini t'an che' bajche' juntiquil tonto ba. ²²¿Hebreojo' ba ili winicob? Hebreojon ja'el. ¿Loq'uemo' ba ti' p'olbal Israel? Joñon ja'el. ¿I p'olbalo' ba Abraham? Joñon ja'el. ²³¿X'e'telo' ba i cha'an Cristo? Joñon ja'el. (Mic cha'len t'an che' bajche' tonto ba.) Ñumen cabal tsac cha'le e'tel. Ñumen cabal tsa cubi asiyal. Ñumen cabal tsa' ñujp'iyon. Colel tsa' cala chamel. ²⁴Jo'yajl jini judíojob tsi' yac'ayñoob ti jajts'el. Junyajl jax yom cha'an cha'c'al tsi' jats'ayñoob ti jujunyajl. ²⁵Uxyajl tsa' jajts'iyon ti te'. Junyajl tsa' jujliyon ti xajlel. Uxyajl colel c chamel ya' ti colem ñajb che' ba

tsa' jejmi barco. Tsac ñusa jump'ejl ac'alel yic'ot jump'ejl q'uin ti ojllil ñajb. ²⁶Cabal tsac cha'le ñajt ba xalmbal. Tsa cubi babaq'uen tac ba ti ja' yic'ot ti' tojlel xujch' yic'ot ti' tojlel c pi'alob yic'ot ti' tojlel jini gentilob* ti tejclum yic'ot ti jochol ba lum, yic'ot ti colem ñajb, yic'ot ti' tojlel jini mu' ba i cuyob i ba ti hermanojob. ²⁷Tsac cha'le e'tel, tsa' lujb'ayon. Cabal ac'alel ma'anic tsa' wayiyon. Tsa cubi wi'ñal yic'ot tiquin ti', tsac cha'le ch'ajb, tsa cubi tsañal, pits'ilon. ²⁸Mach cojic jach tsa cubi jini, pero ti jujump'ejl q'uin mic chan ña'tan i cantantel pejtelel xñopt'añoob año' ba tic wenta. ²⁹Che' an hermano c'un ba mi' yubin pañimil, ¿mach ba c'unic mi cubin ja'el? ¿Mach ba ch'ijiyemic c pusic'al che' an majch mi' yasantel ti mulil?

³⁰Mi wersa yom mic sub c ba ti ñuc, mic sub ti ñuc j c'unlel. ³¹Yujil Dios ma'anic woliyon ti lot. Jini Dios i Tatach lac Yum Jesucristo, mu' ba i sujbel ti uts'at ti pejtelel ora. ³²Ya' ti Damasco jini gobernador am ba i ye'tel ti' yumantel jini rey Aretas, tsi' yac'la ti cantantel jini colem tejclum cha'an mi' chucon. ³³Jini hermanojob tsi' loc'sayñoob ti ventana. Tsi' jich'iyñoob jubel ti colem chiquib ti' ñac' jini chan ba ts'ajc. Che' jini, tsac puts'ta jini año' ba i ye'tel woli ba i chijtañoob.

Pablo tsi' q'uele paraíso*

12 Isujm wersa yom mic sub c ba ti ñuc anquese ma'anic chuqui mic taj. Mi caj c sub chuqui tac tsaj q'uele ti espíritu yic'ot chuqui

tsa' pasbentiyon ti lac Yum. ²Mij can juntiquil winic ti Cristo. Anix chlanlujump'ejl (14) jab tsa' chujqui letsel c'AlAl ti' yuxlajmlel panchan —mi yic'ot i bac'tal o mi loq'uem ti' bac'tal mach kujilic, Dios yujil. ³Mij can jini winic— mi yic'ot i bac'tal o mi loq'uem ti' bac'tal mach kujilic. Yujil Dios. ⁴Tsa' ch'ujyi letsel c'AlAl ti paraíso ba' tsi' yubi t'an mucul ba i sujmllel mach ba aq'uebilic i cha' sub. ⁵Mic sub i ñuclel ili winic. Ma'anic mic sub c bajñel ñuclel. Jini jach j c'unlel mij q'uel ti ñuc. ⁶Muq'uic c sub c ba ti ñuc mach tontojonc, come jini jach mic sub chuqui isujm. Pero mach comic c sub c ñuclel ame muq'uic i lon ña'tañob winicob ñumen ñucon bajche' mi' tsictiyel tic melbal yic'ot tic t'an.

⁷C'ax uts'atax chuqui tsa' pasbentiyon. Jini cha'an tsa' aq'uentiyon wocol tic bac'tal. Ch'oyol ti Satanás cha'an mi' tic'lañon ame ñumen ñuquic mij q'uel c ba bajche' yom. ⁸Uxyajl tsaj c'ajtibey lac Yum ti wocol t'an cha'an mi' lajmesabeñon c wocol. ⁹Lac Yum tsi' subeyon: Jasal i yutsllel c pusic'al ti a tojlel, come mi' ts'actiyel c p'Atalel ti' c'unlel winic, che'en. Jini cha'an ti pejtelel c pusic'al mij q'uel ti ñuc j c'unlel cha'an mi' yajñel i p'Atalel Cristo tic pusic'al. ¹⁰Jini cha'an tijicñayon che' an j c'unlel yic'ot c ts'al'entel yic'ot che' anto chuqui yom c cha'an yic'ot c tic'lantel yic'ot wocol mu' ba cubin cha'an ti' c'uxbintel Cristo, come che' ba' ora c'uñon p'Atalon.

**Pablo mi' c'uxbin jini
año' ba ti Corinto**

¹¹Tsac subu c ñuclel che' bajche' tonto ba. Jatetla tsa' la' ñijcayon

c sub. Mach che'ic yom. Yom mi la' sub c ñuclel jatetla, anquese ma'anic c bajñel ñuclel, come mach ñucobic bajche'on jini mu' ba i lon cuyob i ba ti ñuc ba apóstolob. ¹²Che' ya' añon ti la' tojlel tsa' wen tsictiyi apóstolon ti isujm ti pejtelel ñuc ba c melbal yic'ot c p'Atalel ti' cuchol wocol. Dios tsi' tsictesa yic'ot i yejtal tac i p'Atalel yic'ot ba'baq'uen tac ba. ¹³Junlajal mij c'uxbiñetla che' bajche' mij c'uxbin yamba xñopt'añob mu' ba i tempañob i ba. ¿Am ba c mul ti la' tojlel? Ma'tica anic c mul come ma'anic chuqui tsaj c'ajtibeyetla. Ñusabeñon ili c mul.

¹⁴La' wilan i yuxyajlelix tsac chajpa c ba cha'an mic tilel ba' añetla. Ma'anic chuqui mi caj j c'ajtibeyetla, come ma'anic wolic ña'tan c ch'am chuqui an la' cha'an pero mic ña'tañetla. Come mach i wentajic la calobilob cha'an mi' tempabeñob i chub'an i tat i ña'. I wentajach i tat i ña' cha'an mi' tempabeñob i chub'an i yalobilob. ¹⁵Mi caj cac' c ba yic'ot pejtelel c pusic'al yic'ot pejtelel c chub'an cha'an mi la' taj la' wenlel, come cabal jax wolic c chan c'uxbiñetla, anquese ma'anic woli la' c'uxbiñon che' bajche' ti ñaxan. ¹⁶Ña'tabil la' cha'an ma'anic chuqui tsaj c'ajtibeyetla. Pero mi la' wal maya jax tsac lotiyetla. ¹⁷¿Tsa' ba i chilbeyetla la' chub'an jini winicob tsa' ba c choco majlel ba' añetla? ¹⁸Ti wocol t'an tsac sube majlel Tito. Tsac choco majlel juntiquil hermano yic'ot. ¿Tsa' ba i chilbeyetla la' chub'an Tito? Wen la' wujil jump'ejl lojon c pusic'al

yic'ot jini Espíritu. Junlajal bajche' mic mel lojon que'tel.

¹⁹ ¿Mu' ba la' lon al wolic sub lojon c ba ti toj cha'an jach mi la' q'uelon ti uts'at? Mic cha'len lojon t'an ti Cristo ti' tojlel Dios. C'uxbibilet ba la, tsa'ix c subu lojon ti pejtelel cha'an mic xuc'chocoñetla. ²⁰ Mic cha'len baq'uen ame mach che'ic mic tajetla bajche' com j q'ueletla che' mic tilel ba' añetla, ame mach che'ic mi la' q'uelon ja'el bajche' la' wom. Tic'al mi woliyetla ti leto, tsaytsayña la' pusic'al cha'an i wenlel la' pi'aloob. Tic'al mi an la' mich'ajel, o woli la' t'ox la' ba ti leto, o woliyetla ti u'ya t'an yic'ot wulwul t'an, o c'ax ñuc woli la' pas la' ba, o woli la' contrajin la' ba. ²¹ Cabal mic cha'len baq'uen ame mi' yac'on ti quisin Dios ti la' tojlel che' mic cha' tilel ba' añetla, ame mi cuct'an jini tsa' ba i cha'leyob mulil mi ma'anic tsi' c'ayayob i bibi'lel yic'ot i tsi'lel yic'ot i colosojlel.

Cojix ba tic'ojel

13 I yuxyajlelix talon ba' añetla. Cha'an ti' t'an cha'tiquil uxtiquil testigojob mi caj i tsictiyel mi an i mul winic. ² Ti pejteletla yic'ot jini tsa' ba i cha'leyob mulil mic cha' subeñetla che' bajche' tsac subeyetla ti yamba ora: Che' mic cha' tilel ba' añetla, tsats mi caj c tiq'uetla. Anquese mach ya'ic añon wolic ts'ijbubeñetla che' bajche' ya'ach añon. ³ Come la' wom la' ña'tan mi Cristo woli' c'ambañon quej ti isujm, come wen toj mi' cha'len meloñel

Cristo. P'at'al Cristo ti la' tojlel.

⁴ Anquese an i c'unlel Cristo che' ba tsa' ch'ijle ti cruz, cuxul wale cha'an ti' p'at'alel Dios. Joñon lojon ja'el c'uñon lojon ti Cristo. Pero cuxulon lojon yic'ot Cristo. An lojon c p'at'alel ti Dios cha'an mic meletla.

⁵ Ña'tan la' ba mi woli la' ñop Cristo ti isujm. Ña'tanla bajche' añetla. ¿Mach ba la' wujilic? Woli' yajñel Jesucristo ti jatetla mi isujm woli la' ñop. Mi ma'anic, chocbiletla ti Dios. ⁶ Mi cal la' wujil i winicon lojon Dios ti isujm. Mach chocbilonic lojon i cha'an. ⁷ Mij c'ajtiben lojon Dios ti oración cha'an ma'anic mi la' mel chuqui jontol. Com lojon mi la' mel chuqui uts'at, pero mach cha'anic mij q'uejlel lojon ti uts'at cha'an winicob. Melela chuqui uts'at anquese mi la' lon ña'tan chocbilon lojon ti Dios. ⁸ Melel mach mejlic laj contrajin i sujmllel Dios, jini jach mi mejlel lac tsictesan. ⁹ Jini cha'an tijicñayon lojon mi p'at'alel anquese c'uñon lojon. Mij c'ajtiben lojon Dios cha'an mi' ts'actiyel la' wenlel. ¹⁰ Jini cha'an mic ts'ijbubeñetla ili t'an che' mach ya'ic añon, come mach comic ca'leñetla che' mic tilel yic'ot c p'at'alel tsa' ba i yaq'ueyon Dios. Com jach j c'an c p'at'alel cha'an mic xuc'chocoñetla, mach cha'anic mic jisañetla.

Cortesía

¹¹ Wale hermanojob, ajñenla ti' tijicñayel la' pusic'al. La' ts'actiyic la' wenlel, la' ñuq'uesantic la' pusic'al. Ajñenla ti ñach'al ti jump'ejl jach la' pusic'al. Che' jini, Dios mi caj i yajñel

la' wic'ot, jini Dios mu' bɔ i c'uxbiñonla,
 mu' bɔ i ɣɔq'ueñonla i ñɔch'tɔlel
 lac pusic'al. ¹²Aq'uen la' bɔ cortesía.
 Ts'ujts'un la' bɔ ti uts'at. Pejtelel i
 cha'año' bɔ Dios mi' ɣɔq'ueñetla cortesía.

¹³La' ajnic ti la' tojlel ti la'
 pejtelel i yutslel i pusic'al lac Yum
 Jesucristo yic'ot i c'uxbiya Dios
 yic'ot jini Ch'ujul bɔ Espíritu, la caj
 Pi'leya.